



CLAUSTRA GLION

Biars cuors e

numerusas purschidas

La Claustra dominicana da Glion fa amogna en in cudischet da 70 paginas in vast program d'acziun era per uonn. Ei setracta ton da cuors sco era da numerusas purschidas.

La claustra sepresenta sco in liug da perfecziun, meditaziun ad accumpignament ed ei aviarta per tuts. L'entira purschida stat ell'enzenna dad accumpignar, formar e meditar sur dalla veta. Biars hosps vegnan a Glion en claustra era per viandar, ir cun velo, seslucrar ed era per luvrar nundisturbadamein en ina atmosfera ruasseivla.

En la Casa da sentupada dalla Claustra da Glion ha era il «Cuors romontsch sursilvan» liug dils 17 tochen ils 30 da fenadur 2022. Quel vegn organisaus dalla Fundaziun Retoromana e sespleiga sin 12 divers levels. Vitier vegn aunc in cuors per affons da 6–10 onns. In program accumpignont datti era.

Ina excursiun d'art e cultura ha liug en Lumnezia. Ei dat mo paucas cuntradas svizras cun ina tala rihezia d'edificis sacral. Visitadas vegnan 7 dallas total 33 baselgias e capluttas en Lumnezia. In secund di ei reservaus per il vitg da Vrin, vegnius distinguius cun il Premi Wakker pervia dalla tgira e dil manteniment exemplaric da sia fatscha.

Fatg amogna vegn – sur plirs dis – in cuors d'accumpignar ella davosa fasa dalla veta. Quel sedrezza a persunas ch'accumpognan malsauns e moribunds, mo era a confamigliars e persunas engaschadas ella tgira, professiun sociala e pastoraziun. En tut datti uonn pli che 50 cuors e purschidas cun varga 40 referents e referentas ord la Svizra e Tiaratudestga. (fmr/gc)

Il program sa vegnir retratgs dalla Casa da sentupada dalla claustra a Glion (081/926 95 40)